

Erich Bolinius

Bericht über Kickers Emden

Sendung „Flutlicht“ auf Radio Ostfriesland

Donnerstag, 1.9.2011 18.00 Uhr

auf 94.0 bzw. 87,7

Moin, leev Toehörers,

Kickers Emden hett lesd Week in Langhagen 1:1 spölt un de tweed Platz in de Tabell van de Oberliga Neddersassen neet hollen kunnt. In Langenhagen kwamm Kickers lang Tied neet so recht in Gang un kasserte ok toe Recht dat 0:1 in de 26. Menüte. Was ok heel spietelk, dat **Steven Janssen** sük al in 9. Spölmenüte bi 'n Toesamenprall so seer daan hett, dat he in 't Krankenhaus brocht worden muss. Na 't Spöl see he, dat dat all halv so slimm was. Was blot Bloederguss unner de Kneeskiev.

Kickers spölte in de eerst Halvtied de Ball dauernd quer in de egen Hälfte. Dat maakt ansük al 'n Skölermannskupp neet mehr. Un sowat word bestraft! Een Fehler bi disse Spöleree dee Langenhagen ieskolt utnützen un dat stunn 1:0.

Eerst na de Pausentee, de wegen 'n Unweer bedüent langer as anners düerte, wees de Emden Mannskupp, wo goed se spölen kann. Na 'n Ecke van **Thilko Boekhoff** un 'n hart Skoet unner de Latt van **Andreas Gerdes-Wurpts** kwamm Kickers in de 58. Menüte toe de Utglik.

Dorna was Kickers dauernd an d' Drücker un harr beste Kansen, dat tweed Tor toe maken. In 'n Ofstand van ruugweg 5 Menüten gaff dat heel groot Mögelkeiden. Andreas Gerdes-Wurpts truff in de 65. Menüte de Pfoften un **Bernd Grotlüschen** skoot in de 70. Menüte heel knapp an 't Tor vörbi.

Man in den 92. Menüte harr Langenhagen de Spölverloop bold noch up Kopp stellt, as **Christian Kolter** heel frei för dat Kickerstor updukte un de Ball ok blot an de Pfoften setteste.

Kickerstrainer **Uwe Groothuis** was mit de Instellen van sien Mannskupp in de eerst Halvtied overhoopt neet toefree. „Wenn dat so blifft, komen wi neet unner de eerst Fieven“, meente he toe de Sportreporters na dat Spöl.

Seker sücht dat Sönndag tegen de tweed Mannskupp van Osnabrück al weer beter ut. Man licht word dat neet. De Osnabrückers hemmen sük lesd Jahr in de Oostfreeslandstadion in Emden heel best verköfft. Domaals spölten ok 'n paar ollere ehemalige Bundesligaspölers in de Mannskupp. Upstünns stahn in de Osnabrücker Mannskupp aber blot jung Lü. Osnabrücks Trainer **Joe Enochs** was lesd Sönndag gaar neet so untoefree. Blot de völe Tegmentoren hemmen hum argert. Sien Mannskupp verlor tegen Holthusen-Biene mit 4:6. Hopen wi, dat de Ofwehr van Osnabrück Sönndag in Emden ok weer so open is as Schweizer Käs. Ik tipp een 3:1 Sieg för uns Kickers Mannskupp.

Noch bietje Werbung för 'n **Ü60-Turnier** an de komende Saterdag van Klock tein of an up de Sternplatz much ik hier utnaamswies maken. Disse Turnier word toe Ehren van Oberbörgmester Alwin Brinkmann, de ja bold na 25 Jahr ofdankt, dörföhrt. 4 Mannskuppen spölen tegennanner: RSV Emden, Spölgemeenskupp Emden, Amisia Wolthusen – hier spölen völe ehemalige Kickerspöler mit – un mien Vereen van SV Petkum. Villicht kieken ji maal toe. 'n Shantychor deit ok uptreden un för Eten un Drinken is ok sörgt.

So, nu noch, as alltied, 'n kört Foetballwitz.

De Dokter van 'n Bundesligamannskupp toe dat Thema „Doping in Foetball“.
„Doping in Foetball brengt nix – dat Tüg mutt in de Spölers!“

So leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - netso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.